


Homenahe cultural exitoso dedica na e maestro "Oscar Steba"

ORANJESTAD - Hopi admirador di e gran maestro musical Oscar Steba y tambe fanatico di bon musica a presencia e atardi di homenahe dedica na e musico Arubiano Oscar Steba, cual a tuma lugar dia 3 di December ultimo, bow guia di e maestro di ceremonia, Sr. Ramon Todd. Ya ta un tradicion cultural cu Club Social "Flor de Oriente" y e bes aki conhunto cu "The Caribbean University of Aruba" ta organiza eventonan cultural dedica nag ran musiconan di nos isla.

E homenahe di sr. Oscar Steba a tuma lugar riba "Plaza Cultural Flor de Oriente"; un lugar cu ta forma un escena perfecto pa un homenahe asina.

Bow direccion di e musico hopi popular Etty Toppenberg, un berdadero elenco di musico a rindi nan homenahe musical na sr. Oscar Steba. Bow di e musiconan nos por a mira musiconan di taya manera Eric Escalona, Amado Rosina, Ricardo Garcia, "Zogo" Orman, Flipaman (for di



Alemania), y tambe musiconan di cas cu semper ta acompaña Etty Toppenberg. Varios colega-musico di Oscar Steba di e mihor conhunto di Aruba di tur tempo "sensacion musical" manera Donny Pietersz, Erwin Tujeehut, Alberto Dollison y Ebby Peterson tambe tabata presente.

E animacion di Etty Toppenberg y su amigonan musical tabata un berdadero bankete musical. Den esey e famoso cantante, ruman di Oscar Steba, Sr. Tirso Steba a canta su boleronan inolvidabel pa e publico presente. E publico continuamente tabata aclama Tirso Steba cu ovacionnan pisa pa su actuacion.

Punto culminante durante e homenahe aki a resulta ora e maestro "himself" Oscar Steba a tuma rienda y deleita su fanaticonan cu su cancionnan. Sr. Oscar Steba tambe un bes mas a demostra e taya di musico cu e ta, dor di toca alabes, loke por ser considera su pasion musical di awendia esta synthesizer (piano electrico). Locual tambe a cai hopi na smaak di e fanaticonan, ta ora cu Tirso Steba y Erwin Tujeehut den un duo a rindi homenahe na Oscar Steba. E atardi cultural aki tambe a ser presencia pa Sra. viuda y yiunan di e gran manager "Sensacion Musical", sr. Edwin Zichem. Famia Zichem tabata visibelmente impresionada.

Hopi acerta y emocional tabata e momento cu sr. Frank Zaandam, na number di Club Social "Flor de Oriente" y The Caribbean University of Aruba a otorga sr. Oscar Steba un certificado di aprecia pa su gran logro musical y tambe un precioso plakaat di crystal como un recuerdo pa semper di e bunita atardi di homenahe na e gran maestro musical.

